

Bonj Cozyez Yinxhwnj Doxceng

doiq mbouj gvaq

mbouj youqgaenj

作业本的风波



Ngoenz ndeu cuengqhag, gou cingq sousib daehsaw, mbouj siujsim, bonj cozyez ndeu doek roengz dieg bae.

Gou ngamq yaek siengj gip aeu, doengzdaiz gou

mbouj siujsim caij bonj cozyez gou lo. Raen yienghneix, gou sawqmwh hozndat lo, fok de naeuz: “Ae, mwngz mbouj miz da ha? Cungj caij bonj cozyez gou uq lo!” De ngaem gyaauj yawj bonj cozyez laj din de, boizleix naeuz: “Caen dwg daiq doiq mbouj gvaq lo!” Gou dingq gij vah de le, engq hozndat lo, gou doiq de naeuz: “Mwngz laihaeuz gangj sing doiq mbouj gvaq couh ndaej ha? Mwngz boiz gou!” De raen gou mbouj ei mbouj nyiuz, hix hozndat lo, gyaauj baez niuj, naeuz: “Boiz couh boiz, miz maz liux mbouj hwnj lo!”

Ma ranz le, daxmeh raen gou simcingz mbouj ndei, cam gou ok maz saeh. Gou aeu saehcingz mwh cuengqhag fatseng haenx lwnh hawj daxmeh nyi. Daxmeh dingq le, sonyinx gou naeuz: “Neix couh dwg mwngz mbouj deng lo. Daih’ it, de dwg mbouj siujsim caij bonj cozyez mwngz; daihngaih, de gaengq caeuq mwngz boizleix lo, mwngz wnggai yienzliengh de. Doiq vunz yaek rox lijgaj caeuq nyiuz vunz.” Dingq daxmeh yienghneix gangj le, gou caemdingh roengzdaej, siengsiengj saedcaih dwg gou mbouj

deng, gou gietdingh ngoenzcog caeuq de nyinhloek.

Ngoenz daihngaih gyanghaet, gou haeuj gyausiz, raen doengzdaiz gou gaengq daeuj lo. Caengz caij gou naengh roengz, de hai bak gonq lo: “Caen doiq mbouj gvaq, neix dwg cozyez gou boiz mwngz.” Gangj le couh dawz cozyez ndeng hawj gou. Gou gipmuengz doi gvaqbae, naeuz: “Doiq mbouj gvaq, ngoenzlwenz dwg gou mbouj deng. Mwngz mbouj dwg daegdaengq caij cozyez gou, gou mbouj wnggai mbouj gangj dauhleix, cingj mwngz yienzliengh!” Doengzdaiz yawjyawj gou, raen gou dwg caensim boizleix, couh gangjriu naeuz: “Vunz hung mbouj geiq loek vunz iq, gienh saeh neix gvaqbae lo, gou yienzliengh mwngz lo. Haha——” Raen de riu le, gou hix hehe riu lo.

Aenvih bonj cozyez yinxhwnj ciengz doxceng ndeu, hoeng ciengz doxceng neix hawj gou caeuq doengzdaiz gou gvanhaeh engq doxndei, doxngamj lo.

(Gyanghsuh Swngj Suhcouh Si Gauhsinh Gih Swhsanh Sizyen Siujyoz Yiz Haucwz)

Dahnuengx Gou

我家小妹

Dahnuengx gou bi neix haj bi lo, de youq Cindungh Youwzyenz doeg siujban, coh de heuh Sinj Lozciz.

Gou daeuj lwnh mwngz, coh dahnuengx dwg baenzlawz daeuj. “Sinj” dwg singq daxmeh, dahnuengx riengz singq daxmeh, ndigah couh singq “Sinj” lo; “loz” Sawgun dwg angqyangz, dwg daxboh maqmuengh de ngoenzngoenz cungj angqyangz; “ciz”, caeuq coh gou cih doeklaeng ityiengh, maqmuengh de hix bungz daengz boux vunz miz daekcaiz couh siengj caeuq de bingzciz(caez).

Dahnuengx naj luenzlulu, vunz mbouj suengq sang, lwgda hunghat, bwndaraemx gig raez, de louz byoemgyaeuj lumj duj rael nei, dwggvaez dangqmaz.

Dahnuengx simvuen vuedbued, gij yinx de gig lai. De gig gvaez guhcaemz daeb lozgauh, hix gvaez veh veh, yaep ndeu nyaengq gijneix, yaep he nyaengq gijhaenx. Ndigah, gou ciengzseiz roxnyinh ndang de youq miz sam boux vunz, faenbied dwg: Dah vunz guhcaemz ndeu, dah vunz yawj densi ndeu, dah vunz hagsib ndeu. Sam dah vunz neix moix ngoenz cungj doxhoenx, byawz hingz, byawz couh hawj dahnuengx guh gij saeh byawz.

Mwngz yawj, ngoenzneix couh yiengh-neix——

Banringz, gou cuengqhag ma ranz, ngamq haeuj ranz, dahnuengx couh buet gvaqdaej naeuz: “Go go, gou yaek yawj densi!” Youq gou yawjdaej, seizneix ndaw ndang dahnuengx dah vunz yawj densi hingz lo. Yienghneix gou hai densi hawj de, densi boq gij dungvaben de gvaez yawj haenx.

Dangyienz, dahnuengx hix gvaez yawj saw. De gingciengz yawj bonj saw 《Gunghcuj Byoem Raez》neix, ceiq gvaez gunghcuj Lozbei ndaw saw. 《Geizyienz Naesiet》hix gvaez mbouj sij cuengq, lij gingciengz cang’ yienj Aisah roxnaeuz Anhnaz gunghcuj ndaw saw.

Dahnuengx lij gig gvaez hagsib, riengz gwnz muengx hag Yinghyij, seizneix, de gaengq hag rox Yinghyij “tiger” dwg duz guk, “rabbit” dwg duz douq, “lion” dwg saeceij…… Va, dahnuengx gou ak lai lo!

Sou yawj, neix couh dwg dahnuengx ranz gou gvaez guhcaemz, gvaez yawj saw, youh gvaez hagsib haenx, vunz ranz gou cungj gig gvaez de.

(Cezgyangh Swngj Dungzyangh Si Dungzyangh Sizyen Yozyau Houz Sinjiz)



Daengngoenz Dwgcaengz

烦人的太阳

Banngaiz, gou youq ranz daxdaiq sij cozyez.

Sij daengz dingz ndeu, yawj coh rog cueng, mbouj miz daengngoenz, mbwn raemhrwd, gig hab okbae guhcaemz. Gou buet ok ranz bae, ya, sawqmwh daengngoenz nding’ yanyan okdaej lo, venj youq gyangmbwn ronghsagsag, da cungj hai mbouj ndaej. Mbat neix baenzlawz guhcaemz lo? Mbouj guhcaemz lo, gou mbouj siengj deng ndit dak ndaej mdaemndat! Baeng ndang gvaqdaej, buet haeuj ranz bae. Dawz bonj cozyez okdaej, youh yawj coh rog cueng. Yi, daengngoenz youh mbouj miz lo, gwnzmbwn youh raemhcubcub. Yawjdaej aen daengngoenz neix lij gig rox simgei gou. Ndw hwnjdaej, sou cozyez, caij baez iet gyaauj okbae, yi, lij caengz ok dou, daengngoenz baenzlawz youh okdaej lone, gijmaz eiqsei ma! Daeuq gou ha? Siengj hawj gou youq ranz sij cozyez couh gangj cingcuj, hawj gou buet bae buet dauq mbouj baeg ha? Gou hozndat lo: “Daengngoenz dwgcaengz, danghnaeuz mwngz mbouj hawj gou okbae guhcaemz ne, gou couh doiq mwngz mbouj hekheiq lo, gou yaek……” Couh yienghneix, gou itcig doiq daengngoenz naeuz gij mbouj hab’ eiq gou. Daengngoenz caen geizheih, yaep ndeu okdaej, yaep ndeu youh dauqbae, lumjdwg naeuz: “Mbouj dingq mbouj dingq, couh mbouj dingq, mwngz ndaej dawz gou guh lawz lo?” Mwhde gou huj lo, gig siengj hwnjbae moeb de donq ndeu. Hoeng, mbouj miz aen lae baenzhaenx sang ya, baenzlawz guh ne? Cijndaej danq gaemz heiq ndeu, youh naengh roengzdaej sij cozyez lo.

Caen dwg aen daengngoenz dwgcaengz ndeu.

(Gveicouh Swngj Gveiyangz Si Sizfungh Yen Yungjing Siujyoz sam nienzgaep Lij Swjhwngz)